

दिनांक 19.05.2025
 समय: 18.48 बजे
 आकाशवाणी जयपुर—अजमेर
 प्रादेशिक समाचार

- केन्द्रीय कृषि मंत्री शिवराज सिंह चौहान कह्यो—सिंधु जल संधि टाळ देवण ऊं राजस्थान, हरियाणा, पंजाब अर हिमाचल प्रदेश रा किसानां ने फायदो व्हेला।
- देश मांय 29 मई ने विकसित कृषि संकल्प अभियान सरू कर्यो जावेला—कृषि वैज्ञानिकां रा दल 65 हजार गांवां मांय किसानां ने नुवी खेती—बाड़ी रा बारा मांय जाणकारी दी जावेला।
- मुख्यमंत्री भजनलाल शर्मा अलवर रो दौरा कीनो—प्रदेश मांय दुग्ध संघां रा विकास अर खुद रे पाण ऊबा व्हेवण री सराहवणा कीनी।
- अमृत भारत स्टेशन योजना रा तैत राज्य रा 8 नुवा रेलवे स्टेशन तैयार—75 करोड़ रुपया रा खर्च ऊं केई सुबीता मुहैया करायी ज्या।
- लोकसभा अध्यक्ष ओम बिरला कोटा मांय प्रदेश रा तीजा दिव्याशा केन्द्र रो उद्घाटन कीनो— दिव्यांगजन ने मददगार उपकरण बांट्या।

केन्द्रीय कृषि मंत्री शिवराज सिंह चौहान कह्यो है के सिंधु जल संधि टाळबा रे कारण राजस्थान, हरियाणा, पंजाब अर हिमाचल प्रदेश रा किसानां ने घणो फायदो व्हेला। वे आज नई दिल्ली मांय किसानां रा न्यारा—न्यारा समूहां सागे बातचीत रे दौरान आ जाणकारी दीनी।

केन्द्रीय कृषि मंत्री कह्यो के आवता बगत मांय ओ पाणी काम लेवण ऊं जुड़ी रणनीति बणायी जावेला, ताकि सगळां ने बत्तो ऊं बत्तो फायदो मिल सके। वे सिंधु जल संधि टाळबा रा फैसला ने ऐतिहासिक बतायो। कृषि मंत्री कह्यो के पाकिस्तान ने पाणी देवणो भारत रा किसानां सागे अन्याय है। कृषि मंत्री किसान समूहां रा नुमाइंदां सागे बातचीत मांय सिंधु जल संधि रा बारा मांय राय लीनी।

देश मांय विकसित कृषि संकल्प अभियान चलायो जावेला। केन्द्रीय कृषि मंत्री शिवराज सिंह चौहान आज नई दिल्ली मांय खबरनवीसां सागे बातचीत करता थकां बतायो के 29 मई ऊं 12 जून ताई चलाया जावण वाळा ई अभियान रो मकसद किसानां ने खेती—बाड़ी ऊं जुड़ी बेहतर तकनीकां अर बीजां रा बारा मांय जाणकारी देवणो है। श्री सिंह कह्यो के देशभर रा 723 जिलां मांय चलाया जावण वाळा ई अभियान ऊं करीब डोढ़ करोड़ किसानां ने फायदो व्हेला। श्री चौहान बतायो के कृषि वैज्ञानिकां रा दल करीब 65 हजार गांवां मांय जा र काश्तकारां ने वैज्ञानिक तरीका ऊं खेती—बाड़ी रा बारा मांय व्यावहारिक जाणकारी देवेला। केन्द्रीय कृषि मंत्री वीडियो कान्फ्रेंसिंग रे

मार्फत सगळ्या राज्यां रा कृषि मंत्रियां ने ई अभियान री जाणकारी दीनी। राज्य रा कृषि मंत्री डॉ. किरोडी लाल मीणा ई ई मीटिंग मांय सिरकत कीनी। वे ई अभियान रा तहत् किसानां ने उद्यानिकी रा काम रा बारा मांय ई जाणकारी देवण री राय दीनी।

मुख्यमंत्री भजनलाल शर्मा कह्यो है के प्रदेश मांय न्यारा-न्यारा दूध संघ विकास, जनता री भागीदारी अर खुद रे पाण ऊबा व्हेवण रा नुवा आयाम बणाया है। श्री शर्मा आज अलवर मांय श्वेत क्रांति 2.0 अर अलवर दुग्ध संघ दिवस कार्यक्रम मांय बोल रह्या हा। ई मौके वे सिलिसेड हलका मांय ट्यूबवेल अर पाइपलेण रे मार्फत अलवर शहर री पीवण रा पाणी री योजना और बेहतर बणावण रा काम री नींव रखी। ई मौके मुख्यमंत्री कह्यो के डेयरी हलका मांय महिलावां री भागीदारी बधी है, जिण ऊं राज्य माली तौर ऊं मजबूत बण रह्यो है। वे कह्यो के केंद्र अर राज्य सरकार किसानां अर पशुपालकां रा भला सारू लगातार निर्णायक कदम उठा रही है।

मुख्यमंत्री नौजवानां रा भला सारू करीजी कोशिशां रो ई जिकर कीनो। वे कह्यो के लारला 17 महीना मांय एक ई पेपर लीक नी व्ह्यो। श्री शर्मा कह्यो के लारली सरकार रा राज मांय व्ह्या पेपरलीक रा मामलां मांय 300 ऊं बत्ता आरोपितां ने गिरफ्तार कर्या जा चुक्या है। कार्यक्रम मांय केंद्रीय वन अर पर्यावरण मंत्री भूपेंद्र यादव कह्यो के श्वेत क्रांति रा दूजा दौर रा तैत अलवर मांय 700 नुवी डेयरियां खोली जावेला। वे कह्यो के प्रधानमंत्री डेयरी ने बधावो देवण सारू महिलावां ने मजबूत बणावण, स्थानीय दूध उत्पादन ने बधावो देवण, डेयरी री बुनियादी ताकत ने मजबूत बणावण अर डेयरी ऊं बणायी ज्या सामान री दिसावर मांय बिक्री ने बधावण माथे जोर दीनो है। श्री शर्मा मोतीडूंगरी मांय महाराणा प्रताप री मूरत रो अनावरण ई कीनो। इण ऊं पैली श्री शर्मा जयपुर मांय वां रा रेहवास माथे जनसुणवाई कीनी। ई मौके वे कह्यो के राज्य सरकार जबावदेही अर साफगोई सागे सुशासन सारू काम कर रही है।

प्रधानमंत्री नरेन्द्र मोदी रा 22 मई ने प्रस्तावित बीकानेर दौरा री तैयारियां रो मुख्यमंत्री भजनलाल शर्मा आज जायजो लीनो। मुख्यमंत्री वां रा रेहवास माथे व्ही मीटिंग मांय अहलकारां ने सगळी व्यवस्थावां टेमसर पूरी करण रा हुकम दीना। ध्यानजोग है के प्रधानमंत्री रो ओजू विकसित करी ज्या 103 रेलवे टेशनां रो देशनोक ऊं उद्घाटन करण रो कार्यक्रम है।

श्री मोदी बीकानेर-मुंबई एक्सप्रेस ट्रेन ने हरी झंडी बता र रवाना करेला अर देशभर री केई दूजी परियोजनावां रो उद्घाटन करेला अर केई परियोजनावां रा काम री नींव रखेला। देश रा रेलवे टेशनां ने ओजू विकसित करण सारू चलायी जा रही अमृत भारत स्टेशन योजना रा तैत तेरह सौ टेशनां रो कायाकल्प करण रो काम चाल रह्यो है। आं मांय ऊं हाल ताई 103 टेशन बण र तैयार व्हे गया है।

थल सेनाध्यक्ष जनरल उपेंद्र द्विवेदी आज जैसलमेर कने लौंगेवाला मांय फौज री चौकियां रो दौरा कीनो। वे कोणार्क कोर रा जवानां सागे बातचीत कर र वां ने ऑपरेशन सिंदूर रे दौरान वां रा खास काम सारू बधाई दीनी। जनरल द्विवेदी दुश्मन कानी ऊं छोड़ी ज्या ड्रोन ने आसानी ऊं नाकाम करण सारू फौज रा जवानां री सराहवणा कीनी। वे वायु सेना अर बी.एस.एफ. रा तालमेल ऊं करी ज्यी भेली कार्रवाइयां रो ई जायजो लीनो। ध्यानजोग है के ऑपरेशन सिंदूर रे दौरान जैसलमेर ऊं कच्छ ताई पसर्या रेगिस्तानी हलका मांय वायु सेना अर बी.एस.एफ. तुरत तालमेल सागे कार्रवाई कीनी ही।

लोकसभा अध्यक्ष ओम बिरला आज कोटा रा एमबीएस अस्पताल परिसर मांय प्रदेश रा तीजा दिव्याशा केन्द्र रो उद्घाटन कीनो। ई केन्द्र रे मार्फत दिव्यांगजन अर बुजुर्गा री मदद सारु 30 ऊं बत्ती भांत रा साज-ओ-सामान मुहैया कराया जावेला। कार्यक्रम मांय श्री बिरला 99 दिव्यांगजन अर 127 बुजुर्गा ने उपकरण ई दीना। ई मौके श्री बिरला कोटा मांय 15 करोड़ रुपया रा खर्च ऊं नुवो दिव्यांगजन पार्क बणावण रो ऐलाण कीनो। इण मांय योग केन्द्र अर कसरत करण री ठौड़ समेत न्यारा-न्यारा सुबीता मुहैया कराया जावेला। कार्यक्रम मांय श्री बिरला कह्यो के ओ दिव्याशा केन्द्र उपकरण वितरण केन्द्र व्हेवण सागे दिव्यांगजन रा खुद रा मान रो ज़रियो बणेला। श्री बिरला दिव्याशा केन्द्र री मानवीय पहल सारु प्रधानमंत्री नरेन्द्र मोदी रो आभार जतायो।

माउंट आबू मांय चाल रहयो ग्रीष्म महोत्सव आज पूरो व्हे रहयो है। तीन दिन रा ई महोत्सव मांय देशभर ऊं आया केई कलाकार कार्यक्रम पेश कीना। ई दौरान वठे रा लोगां अर सैलाणियां सारु केई होड़ा ई राख्यी ज्यी। म्हाणा खबरनवीस बतायो के ई महोत्सव मांय मोटी तादाद मांय लोग सिरकत कीनी।

ऑपरेशन सिंदूर रा तैत भारत री फौज कानी ऊं करी ज्या बेहतरीन काम रो मान करण सारु प्रदेश मांय तिरंगा यात्रावां निकाळी जा रही हैं। चूरु मांय आज निकाळी ज्यी तिरंगा यात्रा मांय मोटी तादाद मांय पैली वाळा फौजी, सामाजिक अर सांस्कृतिक संगठनां रा कार्यकर्ता अर जनता शिरकत कीनी। विधानसभा मांय विपक्ष रा पैली वाळा नेता राजेन्द्र राठौड़ ई ई यात्रा मांय शिरकत कीनी। डूंगरपुर मांय ई आज तिरंगा यात्रा निकाळी ज्यी। लक्ष्मण मैदान ऊं सरु व्ही ई यात्रा मांय न्यारा-न्यारा संगठनां रा सदस्य देशभक्ति रा नारा लगाता थकां शिरकत कीनी। जयपुर मांय काल सिंदूर यात्रा निकाळी जावेला। सांसद मंजू शर्मा बतायो के आ यात्रा महिलावां ने मज़बूत बणावण ने समर्पित व्हेला। इण मांय नारी शक्ति, संस्कृति अर हिम्मत रो संगम निजर आवेला।